



*Minggu, 03 Desember 2023*

**Ogen : Johanes 9:1-3**



**Teridah Kuasa Dibata**



Cacat, adi banci ula kal min jadi i bas kegeluhen. Em toto ras pengarapen. Tapi la tersilahkan kinata i sekelewetta lit nge si cacat, entah pe kurang kuh. Lit deba cacat benaken tubuh nari tapi lit ka cacat i bas proses perdalanen geluh. Lit si kuh kerina bagin kulana, li ka si secara manusia ngataken kurang kuh secara fisik ras mental. Lit si mesinteng pengidahna, tapi lit ka nge sikurang mesinteng pengenen matana (pentang/buta) ras sidebanna. Si jadi perenungen, engkai maka enda banci jadi? La nge seri perbahanen Dibata man manusia i babo doni enda? Payo nge cacat e jadi erkiteken dosana, entah dosa orang tuana?

Ajar-ajar Jesus nungkun kerna kalak si pentang kitik-kitinna nari, kai nge si erbahanca maka ia pentang? Dosana entah dosa orang tuana? Penungkunen enda erpalasken pengangkan bas paksa si e, maka kalak si erdosa e ngaloken ukumen, tapi kalak patuh ipasu-pasu Dibata. Pasu-pasu e teridah arah kesehaten, kebayaken ras kemalemen ate. E maka kalak si sakit; pang-pangen, pentang entah gadamen e ukumen erkiteken dosa sinilakokenna entah orang tuana. Perukuren si bagenda i tulak Jesus alu ngataken maka kalak si pentang entah cacat e labo erkiteken dosana entah dosa orang tuana tapi segelah teridah kuasa Dibata bas geluhna. Uga carana? Bas si cacat e lit nilai lebih sibereken Dibata subuk arah talenta si lit bas dirina. Dibata si engkuhisa bas kekurangan si lit. La terjeng si e Dibata pe ncidahkan keleng ateNa arah njadikan kalak sierkiniteken guna banci ncidahkan kekelengen Dibata e man bana.

Wari enda iperingeti jadi wari penyandang cacat internasional. Kune lit kalak cacat bas sekelewetta, mari cidahkan kekelengen, bereken dukungan, kataken maka ia kalak si meherga dingin lit kuasa Dibata bas dirina. Bas GBKP lit Alpa Omega jadi inganta nehken kekelengen. Mari buat baginta.

*“Dibata encidahken kuasaNa arah kalak si lemah secara doni”*

